

Քաղաքապետին յընթրիս, թարգմանն Լատինաց դիմեաց անդ և սկսաւ կագէլ ընդ նոսա, սպառնացեալ զմեծամեծս, եղեալ 'ի մօր զերկուս իրս, կամ բարկացեալ նոցա յարուսցեն կռիւ, և կամ ջնջեսցեն զառաջին վճիռն, բայց նոքա լուռ և եթ կային, և նորա առաւել զայրացեալ ել անտի և գնաց, և 'ի ձեռն երկրորդին իւրոյ առաքեաց զփականս Լատին վանաց, և նորա ընկեցեալ առաջի Դատաւորին առէ, ծերունիք Լատինաց առաքեցին զսոսա առ քեզ, զի ինքեանք ունին մեկնիլ աստի 'ի վաղիւ, զի չէ օրէն այսուհետեւ մնալ նոցա աստ, եւ եթէ էիք 'ի Դատարանն, ամենեքեան ունէին գալ առ քեզ. Դատաւորն ոչ ընկալեալ զնոսա, ասէր՝ տալ ցՔաղաքապետն, զի 'ի տուն նորա էր, միթէ չեղե՞ ժամանակ ասէ գտանել զիս 'ի տեղւոջ իմում, այլ լրտեսեալ զճանապարհս իմ յարուցանէք վէճս 'ի տունս այլոց, զի անպատճառ գիտութեամբ եւ զօրութեամբ հրաւիրողաց գործին այսօքիկ: Ընդպարտեցեալ Քաղաքապետին ասէ՝ քաւ լիցի տէր իմ, զի կրօնաւորք սոցա յամառ և կամակոր են եւ գործեն զայսպիսի անարժանս. իբրեւ ետես թարգմանն թէ չմերձենայ Դատաւորն՝ եթող անդ զփականս և մեկնեցաւ, և նոքա առաքեալ ընկեցին 'ի տուն նորա:

Եւ 'ի վաղիւ անդ յաւելին Լատինք զյանդգնութիւնս իւրեանց անպատեհ բանիւք, եթէ Հայք և Յոյնք ասեն՝ ետուն աքսորել զմէն մի Դատաւորս 'ի պատճառս կռուոյ իւրեանց, այլ Լատինք ոչ միայն զԴատաւորն, այլ և ըզՄիւֆթին, զնախիպն և զայլս բազումս տացեն տարադրել աստի: Չհանդուրժեալ այլ եւս այլազգեաց այսպիսի մեծաբանութեանց, գրեցին զերկուս հանրագիրս յայտնի պատմելով 'ի նմա զյոյզս եւ զխռովութիւնս Լատին կրօնաւորաց, զմեծաբանութիւնս նոցին և զսպառնալիս աքսորանաց, զխնդիր Բեթղէհէմի և Ս. Յարութեան, այլովք ըն հանդերձ, և ետուն կնքել ամենայն զլսաւորաց քաղաքին, ընդ որս և Քաղաքապետին, և Դատաւորն առանձին գրեաց առ Դենպետն մեծ, զմի օրինակն առաքեցին 'ի Դամասկոս, և զմիւսն 'ի Կոստանդինուպօլիս ('ի 20 Օգոստոսի):

Իսկ փոխանակ Բղէչխին Երկթուղեան Իպրահիմ փա-